

21. Custodiebat semetipsum intrepidus, exercebat virtutem sine languore, comparabat opes sine aviditate, fruebatur voluptate, non ei deditus.

22. In cognitione silentium, in potestate patientia, in munificentia ostentationis evitatio: ita ejus virtutes, aliis virtutibus comitantibus, prolem genuisse videbantur.

23. Ei, haud a voluptatibus capto, scientias penitus edocto, atque virtute gaudenti, senectus erat sine infirmitate.

24. Cives ad bonos mores dirigens, protegens atque alens, ille pater eorum erat, patres vero solummodo natalium caussa.

25. Sapienti illi, qui ad æquitatem sustinendam sontes puniebat, atque propaginis caussa uxores ducebat, utile etiam atque dulce honesto continebantur.

26. Mulgebat ille terram sacrificiorum caussa, ut INDRA<sup>S</sup> cœlum frugum caussa: uterque alterna opum suarum permutatione geminum mundum sustentabant.

27. Non certe alii reges hane hujus servatoris famam adepti sunt, furtum, remotum a bonis alienis, solo nomine exstitisse.

28. Vir eximius, etiamsi inimicus, ab illo æstimatus erat, ut medicina ab ægroto; vir scelestus, etiamsi cognatus, rejiciendus ei videbatur, sicut digitus, serpentis morsu saucius.

29. Creaverat sane eum mundi auctor eodem virium nisu, quo elementa ceteras res producunt: nam ut illa, sic DILÍPÆ virtutes unicum fructum capiebant e commodo alieno.

30. Ille gubernabat terram, alieno imperio immunem, unam veluti urbem, cujus mœnia essent maris litora, oceanusque fossæ.

31. Ejus uxor SUDAKSHINA, nomine concordiam significante, e stirpe *Magadhensi* oriunda, similis erat DAKSHINÆ, sacrificii uxori.

32. Rex, etsi frequenti gynæceo gaudebat, hanc feminam prudentem atque LAKSHMIM præcipuas suas uxores existimabat.

33. Ex hac, sibimet ipsi simili, filium exoptans, tempus aliquod transigebat, desideriis expleri cunctantibus.